

摘藻堂四庫全書薈要

集部

欽定四庫全書薈要

集部

懷麓堂集卷二十三



欽定四庫全書薈要卷一萬六千六百五十一 集部

懷麓堂集卷二十二

明 李東陽 撰

稿二  
序

京都十景詩序

京都舊有十景景有題曰瓊島春雲曰太液晴波曰西山霽雪曰玉泉垂虹曰盧溝曉月曰薊門煙樹曰金臺

夕照曰居庸疊翠蓋即元所謂金臺八景者頗更定之  
永樂間翰林諸儒臣皆有詩英宗睿皇帝增其二題曰  
南園秋風曰東郊時雨於是為景凡十諸翰林復皆有  
詩詩凡若干首為幾卷於乎盛哉惟帝王建國立都必  
有山川關輔之勝宮闕城郭之麗車書文軌民物之感  
以觀天下而鴻儒碩士必有文章歌詠寫之琬琰播之  
金石以示後世不可闕也蓋古之稱名都者有三若長  
安之河華東京之嵩洛金陵之鍾山大江皆有所據以

為勝漢則有司馬相如之上林揚雄之甘泉長楊班固  
之兩都唐則有李白之明堂杜甫之太廟南郊西嶽韓  
愈之南山宋則有王禹偁之籍田宋祁之園丘王畿范  
仲淹之明堂周邦彥之汴都或詩或賦鏗錫炳耀後先  
相望皆足為天下後世道然校之三代之盛則亦遠矣  
金陵之都以一統御天下者實自我國家始今京師居  
太行滄海之間其地亦勝乃出於古帝王智慮之所不  
及又非元氏之所能當者則我國家億萬載太平之業

顧非天之所遺乎蓋自契丹以來五百年餘此地不得與於中國今承平既久民物繁庶制度明備山川草木亦精彩溢發若增而高若闢而廣校之父老所傳草創之際蓋已倍蓰而科甲之魁傑館閣之耆俊天下之所謂文章者固於是乎在古稱文章與氣運相升降則贊揚歌詠以昭鴻運垂休光者無惑乎其盛如此也若夫聖君賢相盛德大業所以植國家阜民物著之典謨勒之金石軼漢唐宋以擬三代之盛尤有不可闕者某將

於今日之詩卜之也某幸生京師竊觀其所謂景之盛  
又廁翰林之末而材力淺薄不敢以作者自效謹推本  
其意而序之

送四川按察副使彭君序

成化庚寅皇上始命吏部得專舉布政按察之任而親  
進退馬示重也會諸大臣循行四方多所廢黜乃次第  
易置之人於是時皆傾耳拭目以觀天下卓犖奇偉之  
士將出也其首選果得彭君鳳儀輩數人而君實為四

川按察副使非聖天子睿哲察於羣僚何一指揮變置  
間得人如此哉君舉名進士累官至刑部廣東司郎中  
平生忠節自與無敵側骭之行視夫營營苟合詘志  
以媒進旅退以辱身者蓋所恥聞不啻其所弗為也其  
所處司號繁劇之地事多涉於艱挾勢而席寵者傾前  
覘後左撞右突中立不動屹然以定民之負枉抱鬱失  
利而狂奔者則為之鉏彊剔蠹奪其有而歸之雖罹咎  
戾必無所恨悔焉閒居簡默未嘗言人過及所論奏侃

侃以為不可用者排譁笑怒罵而為之既而果中如左

右契相合用是信於上而下益彰其植心之端任事之  
力燭物之鑑如此皆君子之所難而兼有之謂為天下  
卓犖奇偉之士非邪夫負天下材受一方之寄其所樹  
立必稱舉其職不下土汨沒於世無疑也况天子之所  
親擢出於恒典以感激而督厲之哉又况更張易置之  
餘天下想望其風裁將十倍於常時者哉然固有為九  
仞山卒隕於一簣者此誠衆人所知而或賢者所不能

免也君其慎之哉君之行也諸君子皆餞員外郎葉崇禮謂予曰彭君子嘗知之矣今且去子寧闕子淵贈言之誼蹈仲尼失言之戒乎嗚呼若是則子惡敢當誠有不可已於君者然亦可以為君贊獨於為山之義有取焉若曰此固君之所知則予既已知之矣

遊會稽詩後序

士相遇於少壯之年未有以異也少者壯壯者衰苟趣舍之既成蹤跡之既定則其窮達莫有同者焉而又有

憂樂干其中夷險接其外則其死生莫有同者焉故疇  
昔之笑談歡謔寄於歌詠者皆慨嘆之資及其至也或  
有流涕歎歔而不能已者此人之情也然君子亦得有  
以感焉曰某某賢人也窮不為晦天不為殤也某某不  
賢人也雖達弗顯雖壽弗永也故觀蘭亭之詩而王羲  
之之骨鯁徽之之放誕謝安之簡靖萬之矜傲孫統之  
恬退綽之剗直皆得以具見而其窮達死生之異則有  
如所謂視今昔齊彭殤者而世之大觀盡矣正統乙巳

嘉禾姜處士遊於會稽會稽賀徽輩與其子用貞友也  
載酒與遊賦詩若干首徽為序又八年處士卒又十年  
用貞以行人司副贈處士官蓋至今二十有一年矣而  
同遊物故者三人仕者十有七餘皆散處南北莫有同  
者其詩固在也用貞嘗見其人曰吾先子所與遊也誦  
其詩曰吾先子所與詠歌也蓋因之而流涕歎歎焉而  
其人者之見其詩亦有不能已者矣用貞予同年進士  
其年與德皆先於予而與予交甚厚因得觀其家所藏

詩而序論之曰處事親有王延之孝讓弟分田存薛  
包之誼與人共事而獨任其咎近孔融之節其窮不為  
陋其沒不為夭其有賢子而貴及其躬也不為愧後之  
觀者或可想見其人矣序及詩若干人予未之悉也俟  
考而後續焉

送朴菴先生省墓詩序

先皇帝復於位之元年惟我先生奮竒挺靈來自南國  
為天下進士首帝若曰爾某為翰林院修撰職我文字

黼黻我太平儲德宅材以用於爾他日今天子嗣位擢  
左春坊左諭德進左庶子乃在天順間有詔為大明一  
統志成化間為睿皇帝實錄先生皆為纂修官名載勅  
旨凡小而郡縣沿革山川形勢人物風土之概禽魚草  
木金石之名與數大而黜陟刑賞禮樂教化之迹詔誥  
辭令功德謨烈之紀載州分縣析類列而年編之書史  
圖籍山經地志金匱石室之文旁搜密檢操觚秉筆窮  
年而累月其於國有勞焉用是對揚在廷既簡既嘉前

有勅後有誥太史撰其詞中書摛其豪尚寶緘其章鸞  
飛蛟厲經回緯合紹奕世而騰隆光者其於家亦有榮  
焉今朝廷熙明典物昭備無事述作詞臣學士往往得  
優游侍從間先王始作而言曰吾可以及吾私矣乃上  
疏曰臣父贈左庶子臣某棄臣若干年臣母贈太宜人  
某氏亦棄臣若干年臣忝在侍從有以事陛下者惟父  
母之力之德是賴今墳墓在鄉邑久不治臣比屬史事  
不敢言履省者十有五年矣臣得歸畢一日之私惟臣

佩陛下之德罔敢數官程期具在臣奔走左右服事亦罔敢後通政使以聞事下吏部覈實覆奏請如庶子某言制可賜楮鏹為道里費明日先生具袍幘大帶笏入謝又明日陛辭乃行鄉人朝士咸仰羨聖天子寵眷禁近之恩賢大夫不忘其親於官之義斯乎備矣門人翰林院編修李東陽倡於衆曰我先生夙昔自處大節惟忠惟孝其教我後之人亦惟忠惟孝茲一舉而二義存焉凡我二三子膺德服誼粵茲有年惟此大事曷敢無

述時門下士仕處散於四方者甚衆惟兵部主事劉大  
夏刑部主事尚敬進士王儼朱紳舉人楊一清和之其  
會試所舉士吏部郎中倪輔兵部主事許章刑部主事  
許盛行人左司副姜諒行人馬暎又和之東陽獨謬職  
文字從先生後謹為序并詩再拜以獻於執事者

王城山人詩集序

王城山人詩者黃巖謝君世懋之所作也君居於王城  
山遂以其山自名居為縣學生七試於有司不得薦客

死於武林之邸其從子翰林編修鳴治輯其遺詩得若干篇予讀而悲之其詩始規倣盛唐諸人得宛轉流麗之妙晚獨愛杜少陵乃盡變其故格益為清激悲壯之調思極其所欲言者其死也蓋有遺力焉然其叙事引物感時傷古憂思笑樂往復開闔未嘗不出乎正觀此亦可以知其人矣夫詩者人之志興存焉故觀俗之美與人之賢者必於詩今之為詩者亦或牽綴刻削反有失其志之正信乎有德必有言有言者之不必有德也

君之志與不啻乎詩不幸而不見於世非其詩孰可與  
傳者此輯詩者之志也古稱詩人達少而多窮其固然  
者之與適然固未暇論然其窮也人莫不悲之其悲之  
者亦不必皆賢也而徒以其詩况非獨詩人哉予恒謂  
天下之士必有負竒抱傑老死於岩穴之下者有士如  
謝君非詩則莫之知也天下之士不幸而不見於世者  
何限於此蓋重予之悲而益感夫輯詩者之志也君之  
兄世修為寶慶知府及鳴治皆賢而能詩其所倡和者

尤多不在卷中

送屠元勳序

有正設之官有旁攝之官有專設之官舉天下之事條分而類總之各有攸執此正設之官也事有大小有常與暫以其所及及其所不及此旁攝之官也謀之周計之密條總之所不能及者為之官以領之不以他事及之者此專設之官也夫官至於專設天下宜無遺事也然猶或有弊生其間者夫勢有及有不及則及乎其官

勢及之而有治有不治則及乎其人吾嘗以是觀於天下未嘗不歎息焉今專設之官惟戶工為多漕運之制分兵民之賦責之以府衛總之以將帥足矣又以其舟楫之具不可煩於民然苟無以總之則無以為責故專設工部主事一人於淮之清江浦每三年一代居竹木之材置工役吏隸以治之凡漕舟之敗漏不中於用者悉歸之而加葺斲焉數闕則增置之以為用此所謂周謀密計之一端也而適年若少異者出納之際並緣為

姦官府之利不能十一一舟之費或倍或蓰故其資於舟者寧自為之不敢以煩於官而官若徒設所謂弊之一端也成化辛卯秋前主事以年當代進士平湖屠元勳實拜茲命以行元勳年質甚英敏富才與藝此則無負於國家專設之意所謂存乎其人者也元勳之舉於禮部也予校其文其中表兄倪稽勳良弼則予同年進士予知元勳之賢於稽勳為多而元勳之同年鮮文選尚敬復來徵所贈故叙其端如此

送翰林編修丁君歸省詩序

華亭丁君原敬以進士第二人入翰林為編修其父封君貽穀翁母孺人皆在華亭不家養者五年矣君乃用例乞歸省其鄉既賜許復有楮鏹之賚閣老學士諸先生而下皆賦詩餞之某以次辱授簡當為序乃作而言曰士在官各事厥事非謁告不得違朝從非差遣不得離職次非引謝不得至其鄉邑然獨省覲之禮著在典式又為之道里費出於尋常廩賜之所不及所以敦孝

崇禮而勸忠者甚大此國家之令典也今之諸曹百執事各有長屬以法相視事有稟白不可則唯唯而退以事當出立受約束於庭已輒俛首去不敢漫及他語其勢分懸絕固然莫殊也惟館閣以道德文字為事雖師保耆宿位尊而望重亦與後進之士相賓主下上論議閭閻侃侃各中其度情交而義達喜有慶行有饒周旋乎禮樂而發越乎文章倡和聯屬疊疊而不厭所以汲引成就之意甚厚此詞林之盛事也古者王遣使臣

作詩皇華行役來歸杖屨是歌朝臣相餞乃陳蒸民君  
之使臣如不得已故慰勉之情不能忘其所愛而况使  
之得遂其愛者哉臣之出雖以王事然猶以職業相期  
厲如恐不及而况乎以親去者哉故遠鄉井則懷其親  
遠朝廷則愛其君皆有不可已者感激奮發使家不失  
為孝子而國得為良臣此則人之大節士君子之所自  
盡也君之仕也遭天子明聖海內熙洽史事閒暇孝理  
之化惠及家庭可謂出其時操文字之事以從諸先

生之後為其所汲引期厲如此可謂處得其地而君又負卓犖竒偉之才之器必有所建立其上廣宅材禮士之效下成師師之美於天下無疑也夫國家之令典詞林之盛事士君子之大節其所關繫甚重皆不可以不白某不佞請以庸言發之可乎

一閒軒詩序

情生乎動者也動之極則靜生焉然人能動而不能靜天下之通患也天下之事相尋於無窮人之一身與之

周旋乎其間操眇身以當天下之事其動不啻萬一故善用情者以一應萬如鑑之於貌括之於矢來則應之去則遺之故事畢而情不困不善用情者以一徇萬萬萬相臨事愈多而身愈勞乃有求靜而不可得者其不知求者固弗論也農則勞於耕工則勞於役商則勞於旅士則勞於官其情之大小雖殊其為勞一也舍乎此則遺形外骸玩世狎物無所用於天下者非君子之所謂靜也惟功成而身退者其庶幾乎然於此猶有不能

者非地之不善也有見於此者其知道乎絳州有一間  
先生者姓陶氏宗衡其字舉進士歷官行人禮部員外  
郎陝西左參議皆以賢勞著聲年六十則嘆曰吾可以  
閒矣謝其事而歸閉門高卧不與世相聞或深衣鉤履  
徜徉於水邊林下有問其姓名者曰我一閒人也或問  
之曰先生其知道者乎笑而不答洞然莫測也士大夫  
多為一閒詩以遺之者先生欣然咏之集而成卷其子  
戶部主事廷用以示予請序其後廷用既奉使於南則

使其弟鄉貢士琰來請予昔舉禮部時先生在儀制掌名籍而廷用復予賢同年也故為之序

送周徽州考最還官序

今之為守令者各據所見為理皆足以立名取效而樊隨之或修案牘明號令勤手足之力以為奔走嚴刑厚斂竭膏血以奉所需惟所徇藉不顧慮其下故往往為權貴所推許而細人鄙夫方怨讟之不暇或有見於此則循循守規矚不失尺寸以庇其民而自恃以桀驁其

上又故為抗俗以立崖岸取聲譽故民皆譽之而為之  
長者以為異小則怒於言大則怒於法矣又或有見於  
是以為二者皆不可失則為裨闔縱橫之機惟所弛張  
而上下傾倒故官有賞民有譽而士大夫之旁觀者將  
指而議之無所逃焉然則欲完其名豈不難哉夫名固  
非君子之所貴也然孔子疾名不稱又曰在邦無怨在  
家無怨為孔氏者亦曰在下位不獲乎上民不可得而  
治矣獲乎上有道不信乎友不獲乎上矣故其道本乎

誠身誠而不動者未之有也是名亦君子所不可闕也

徽州守周君子建吉安人也世居遼以文學名遼人士  
若今曾給事克恭陳進士本仁吳進士克明從之遊者  
若干人及舉進士歷官工刑二部主事員外郎皆以政  
事名尚書而下咸雅重之其守徽也一年而民悅再踰  
年御史以為能報之天官三年以最聞於朝士大夫所  
推許者藉甚予竊聞君之為人敦樸忠厚無佞側委曲  
之行故不恃才而官自舉不求名而下上信之此固士

君子之實行其道宜然也予又聞徽人言比歲久旱君率僚屬徒跣以禱雨輒大至有蟲傷禾稼亦禱以除之若是者豈獨人信之苟順且誠亦信乎天矣君守其志使不變雖用是名天下及後世何愧哉君之考績而還也進士蕭君文明輩相與餞之而屬予以辭或曰周君非好名者不宜以是告之予曰吾所謂名非今之所謂名也

送丘給事使琉球序

我國家正位凝命掃乾盪坤滌濯萬物逮於百年治洽  
功成五服之內藩臬郡縣所治出賦稅共使令者弗論  
以至於海中外疆殊界別以國稱者萬數邇者先沾遠  
者後被冠裳椎卉詩書甲冑梯高航深四面而至充中  
庭溢下館禮部繁於出納鴻臚勤於奉引相胥疲於通  
譯自有中國以來無若是盛者若琉球國在海東而諸  
國小大遠邇之間烟火相望順颺利舶七日而至然其  
始俗以盈虛為晦朔以草木為冬夏粵自古昔未通於

中國雖或窮征黷討而賓服無聞及國朝號令所及望

風歆附遂封為中山王齒於載版圖奉職貢者日涵月

煦潛移暗革被服冠帶陳奏章表著作篇什有華士之

風焉成王庚寅其王世子某當嗣封遣其長史某來請

命天子封為中山王賜璽書冠服遣正副使二人致命

中山戶部都給事中丘君弘實充正使賜朱衣一襲以

行六科諸給事相率為行餞徵辭翰林某與給事君同

年言在不讓曰於戲給事大丈夫入居諫諍出領使命

真通顯稱所願為今聖天子在上士大臣在列嘉惠於  
彼外國中山王謹畏孝順不隨臣節以俟我威命而給  
事身負荷之國體之所繫小邦之所瞻後世之所傳示  
皆在給事給事其克自重感厲精發山動海立以宣達  
天子威命國家之典章式侔小國君長陪從爰及閭巷  
明識逆順保其初心惟億萬世服事罔敢數亦罔敢後  
於戲豈不真大丈夫哉給事君起謝曰使者職敢不免  
於是諸給事驩曰使哉使哉乃導上供張三爵而退也

送周揚州序

成化庚寅京師饑天子簡廷臣出領賑事命之曰用命  
 且有賞不用命有罰監察御史周君本清亦在簡中分  
 理順天數縣辛卯事畢告於朝首擢為揚州知府夫守  
 令之職非直衣食乎民也而食與衣莫先焉凡百之事  
 胥此焉出今有五尺之童號於道其倉皇為之求食與  
 衣者必其父母也平立睨視談笑而過之者必塗之人  
 也不惟弗拯而且褫奪之撼頓之者必其仇讎也今之

守令者將為父母焉將為塗人焉將為仇讎焉仇讎固不足論苟徒愛之而弗拯是亦塗人而已矣為之父母者必為之計深遠先事而圖之因時而為之即田有常畝桑有常樹賦有常等除其兼并均其徭役以使有餘不幸有小害不失其利又不幸而大害猶能免於死亡夫是之謂民之父母不能先事而圖因循怠惰以至為病為亡為盜然後從而拯之其力必且十倍而况未必能拯之乎夫比歲之災去歲為甚去歲為災畿甸之郡

縣為甚畿甸之郡縣其為病為亡為盜者相望也其所由來者久矣卒以朝廷數百萬之費一二臣簡任之專遲之以數月之久僅足以弭其患之大可不謂甚難乎思其艱以圖其易古之道也以今歲校往歲不可謂不豐以南方校北方非不富且庶也而揚州又素稱繁庶之地比年以來亦損其半矣識者蓋深憂之天下之事惟憂於未舉者乃可以無弊由是言盡天下可憂也而况揚州乎此惟深謀遠慮之士可與言之而世俗者之

所謂迂也周君在吾鄉為賢士在臺憲為賢御史在畿甸為賢使臣茲州之治朝廷實畀之而吾輩實深望之也周君勉乎哉

送宋民表知華亭詩序

吾民表之知華亭也待次天官者一年時京曹無闕員有以差遣避外補者謂民表民表曰吾力不能與造物者校竟不出及將拜或又謂曰今以進士為縣者三載則擢擢則為御史其得失亦少校乎民表曰吾安是官

也久矣吾何慕焉吾恒為吾輩之慕乎此也苟有所慕  
必有不盡其心者矣既拜則謂予曰人恒易此而不為  
吾得此蓋懼其不能舉也或曰是大邑也可以取而無  
傷於廉可以守而不至於無所容或又曰地美則易汙  
易汙則守之也難斯二者皆非也人患不自持苟有所  
利何必大邑無所利雖富且庶吾何與哉若是者吾敢  
以自許也吾所憂者謂其利弊之莫周知德澤之不能  
徧及也自是每數日輒謂予曰吾於某得某事焉於某

得某事焉弊之不除也利之弗興也如此者數十事不止其言甚悉凡論為縣者莫如焉又數日復曰吾嘗思之守令者民之父母也故恩先而威後平易者古人所以近民也今之能守令者但知有法而不知有情故寧急無緩寧嚴無寬寧使民受其害而不使我難其力若是者吾弗能也繼而又思之以為是固然矣於是則有辯焉苟以漫漶為平懈慢為易民抵惡而不戒胥吏舞法而不知廢紀綱散條貫以至於大壞極弊而不自知

者則吾輩所當深戒也予與民表遊久知之最深凡前  
所具固其所存無足異者然猶頗有素蓄欲以為民表  
告及聞此言則民表雖日強聒使予告豈復有餘說哉  
民表仁人也予恐其或過於厚信斯言之不可無而踐  
之不可以不果也民表幸而忘之吾為子識之以贈子  
行民表曰善於是交游者皆賦詩送之其意多為民表  
期者予序諸篇端以互相發云

送李士常序

今之仕也異於古皆取之乎科目舍科目則不得仕仕亦不顯故凡稱有志於天下者不得不由此焉出觀其平居嚮乎道義將藉以自試則其大者可以興道弘化小可以建功立名隨所底極皆能有以自見然猶有論篤而志不孚者有志於始而變於終者有志雖及而力不足以逮之者若希富慕貴之徒黃緣僥覲惟幸於一出者又何足望哉予於李君士常之出於科目固不得不切望之也君夙有嚮於古聖賢之學修身睦親志存

及物其與賢大夫士接則踧踖愧汗殆無所容而其中之所動踊溢迅踔有不可遏之勢其於惡言跛行若將免乎其身而又懇悃惋惜若欲援而反之而未能者將有以自試也今年秋始以其藝舉於鄉大夫士聞者既進以為主司賀則退以賀君子又交君之最深者知其志論不悖且必不委靡而感勵奮發以自見於世無疑也然志於天下者必周於天下之務故凡紀綱風俗人物之概制度名數之節閭閻獄市軍旅郡縣之宜古今

成敗得失盛衰不恒之迹一有闕不足以為治不能兼  
究乎此而徒嘐嘐然有志於天下則亦何所濟哉古之  
人如諸葛武侯范文正皆居布韋而經濟之事已具故  
其出也確然有益於用以名天下及後世君仕且有日  
矣其究於此亦多矣歸而求之觸類而長之使其通貫  
旁達若探之積囊若駕之坦途有弗謀謀之無所弗知  
有弗任任之無所弗能由建功立名以及於興道弘化  
無所弗逮使天下之人曰科目之果能得士也又曰君

之果無負於科目也此則予之所望也予蚤竊科名而  
愚闇淺劣莫之自遂愧於君之積學彊仕者故喜君之  
出而望乎其成者尤切凡諸太史及吾時用所叙論者  
不贅及焉若謂予略於內而詳於外則非能言者也

懷麓堂集卷二十二

欽定四庫全書薈要卷一萬六千六百五十二

集部

懷麓堂集卷二十三

明 李東陽 撰

文稿三

序

送福建叅政徐君序

福建之地凡府八福泉漳興化皆瀕海海外接倭夷諸國椎舟之徒潛度竊掠自古而然我民利私市者亦相

為黨羣颺巨舟弦強弓往返其地若南北市者以為常業其事甚重朝所置官多分廵互代不恒于職其勢莫能制乃專置叅政副使者一人理之成化乙未吏部以例考天下之述職者罷布政按察之長若佐若干人于時茲二人者皆闕浙東徐君原一實用推擇為右叅政承勅以行徐君任職方久官至郎中行業才諳為諸曹望舉于是職固所優為夫職方掌天下軍旅之務夷狄盜賊無所不治但數年于今屢事西北其所經畫區置

宜詳而東南外警頗息常時盜竊不煩於朝署事勢情  
狀或在所略也今東南之人曰備外警易治內盜難販  
鬻之民迫於寒饑散則無所歸則無籍縱而不問則纏  
結無窮急而攻之則以死狗鬪其患有不可勝言者治  
之者必先本後末宏綱而疏節均田薄歛以安其業委  
曲開諭明示利害以啓其歸而又蓄威養力以待其不  
可化使善者不移則惡者有時而盡矣其先後緩急較  
之他處宜有不同者若士卒之亡竄困庾之虛耗武官

介士之梧克腋削則天下之通弊君蓋嘗為予論之以為弊成于實喪功患于柄分此理固然無可易者今君以全藩之寄承專置之託弛張操縱惟所欲為而莫之掣而又濟之以才略持之以忠信竭心力而為之吾見外警之不足備雖內盜之治也不難矣

送泉州衛經歷鍾君序

文武之在天下不可偏廢而其勢則相為重輕官之始設也內以五府視六部外以都指揮視布政按察以衛

視府州縣其秩皆有加焉今名焉雖存跡其行事不翅不能頡頏而顧出其下有不可變者府司衛之官必有經歷都事皆以文士為之以叅佐謀畫閑革奸弊其秩雖卑而所託則重矣然以今觀之方委曲聽命之不暇其所得為者不過會錢穀行文書而已是何其懸絕如此哉秩有尊卑而其勢有難易也予嘗究設官之意而論之五府之務必於六部都司之務必于布政按察而後行則所以尊其職者非偏重之也知其勢之必至乎

此也夫使文得以叅武而使武不得以間文則其輕重固已可見况今經歷都事在內者月再報其長之勤惰于朝推于其內可以知外則其勢之不得為者亦存乎其入者也嘉興鍾君汝文以國子生拜福建泉州衛經歷汝文嘗因其從子刑部主事庭芳游于羣士大夫間於是顧君天錫輩以贈言屬予予竊謂今當天下無事時武胄之士罕得施用則所謂經歷者雖欲有所贊佐亦不可得獨法久弊生不能無賴乎閑革之力者而泉

州外有海島之警內有販鬻之盜東南之地於茲為重  
故所以望汝文者尤切汝文勉乎哉若曰吾不負官而  
官負吾如古之所謂丞者予亦末如之何也已

送戴訓術序

崑山戴用中少失怙鞠於母氏既壯通陰陽之學有志  
乎仕而未遇也比者縣陰陽訓術闕用有司薦上吏部  
移欽天監試以為宜遂拜訓術之命行有日進士吳君  
惟謙謀以予言張之易曰定天下之吉凶成天下之亶

疊者莫大乎蒼龜故唐虞有羲和之職周禮亦有太卜  
筮人之名後世陰陽之官蓋取諸此國家開物成務天  
下事無小大緩急苟民生日用之不可闕者固不備舉  
崇儒建學之暇若陰陽醫藥亦有學官徧于天下其為  
民物慮至矣然陰陽之學株分蔓續代異而時不同若  
五行若堪輿若建除若歷數若祿命卜宅卜葬多至  
數十家而牽數泥俗舍人事而任鬼神固已見于漢班  
固唐呂才之辯矣况後世乎今象緯有禁民間莫得而

習所謂陰陽者不過卜算推擇之類官之取之者甚簡且易而時俗所習信有如前所論者用中以術為訓則宜推明其理數之大如易所陳如書禮所命以仰副國家設官擇士之意取時俗之陋一洗而空之然後為善也用中以為然乎予未嘗識用中將因二君以考其志之所嚮恐其為司馬季主之卜予之辨又出宋忠賈誼下安恃其不相屈也吾聞用中本名族讀書好禮接賢士如恐不及非泥于其術者比世固有吏而隱者非此

類也乎若因予言而勉焉其所得亦未可量也

送舅氏劉侯之寧夏序

寧夏之域左界黃河右臂賀蘭諸山在山邊為險地然其所統方數千里而河曲乃居其半則皆連山大沙無長城巨塹之險自河外失據畫地以守不過數百里列堡分堠一功而什力今敵騎之警不及寧夏乃自花馬池興武諸路以入則寧夏所備不在外而在內非鄉之形勢可論也故守寧夏者必慎守河曲河曲寧則寧夏

可以高枕而卧矣然以今昔之異勢而成什一之全功者豈不難哉古之論擇地者必先擇人故南城有檀子則楚寇不侵高唐有盼子則趙人不入徐州有黔夫則燕趙交際雖齊之一國尚如此况國家一統之盛羣才之富而制遠方之敵則亦何所憚哉今年夏巡撫寧夏都御史張公議政于朝言其所統甚廣而裨將不足于用上命兵部簡于衆得三人其一則我舅氏署都指揮同知淮安劉公永也公以武胄蚤閑騎射從征于外南

至湖湘貴州以入兩廣北歷萬全西極于三邊之界皆  
在閩幕執旌鼓符信以號令羣士多所俘馘策名功籍  
遂自千戶累涉都閩人以為才居常奮厲欲以兵革自  
効今強敵未滅尚厯朝謨而公適以選擢承委任識者  
知其將建功于西鄙也嗚呼士既患無才而又患于無所  
用以公之才得謀國求士如張公之賢者而為之用其  
將有所賴而成乎東陽少負陟屺之感于公之行深有  
感于涓陽之義方喜邊鎮之得才與公之獲于用也故

先述其大者而後及其私焉

謝氏宗譜序

謝氏出周申伯之封世遠派別漢晉間稍稍可紀而會稽之謝始擅天下今黃巖謝氏舊譜稱典農中郎將纘蓋自纘至僕射由若干世為一圖自由子經略使鞅徙居黃巖者又若干世為一圖世亂闕逸多不可考其後或妄加補緝遂成完書雖其子孫亦莫之知也成化庚寅溫嶺鄧端朝氏脩于翁山之塾以會稽派遠始削其

圖而鞅以下猶因其舊知寶慶府愚得先生世脩嘗侍其季父梅坡翁性玉獲聞同異之實辛卯之歲乃取舊譜參用歐蘓家法闕疑去偽揭鞅為始遷之祖斷自灤為一世世經而支緯之既又與其從子太史君鳴治推義廣例為名錄為譜傳為宗範為居址世考為祠墓志又系以累朝誥勅及士大夫所著述者類為若干卷篇有序序有義可謂無遺法耳矣夫譜有傳與紹之道焉由吾而前吾得而紹之由吾而後得吾而傳之所謂傳

與紹者非恃乎譜也而非此則無所于繫故君子之有事乎家者必先焉今之世雖士大夫家鮮克存譜其存之者不過以世數名字為稱詡辯據之資而譜之道幾廢其或附會竊冒以偽于其身以及其子孫者又弗論也夫以譜猶不能恃其必傳况以偽乎茲譜也溯宗系則興其媯睦紀居址則慎其承守睹祠墓則嚴其祭祀瞻錫典則思所以厲乎為臣誦宗範考傳記則思所以為子而不愧而詳其敘述則使子不得以私慕誣其父

而祖不得以私譽望其孫以求盡乎其實噫茲譜也其可謂無遺法耳矣且古之論國與天下者必有道德仁義之本而又有憲章條格之具蓋皆自其家始寶慶公行高學博有古循吏之政方斂其所以為郡者施于其家而太史君又承其家學以大施于天下皆將自茲譜始譜之作豈徒傳哉按謝之先有諱溫良者為孝子有趙氏者為節婦固茲譜之所恃以為重其他名德尤多至寶慶公乃益顯其承之者皆能如太史之于寶慶則

茲譜之紹也其亦不徒存也哉

送開封金公序

今年春河南開封府知府闕吏部詢于衆得刑部郎中  
金君尚德曰是嘗游翰林而通古今政治之迹為行人  
而知山川風俗利病之槩為刑部而諳法律精條例及  
民物之情狀且其人卓特敏達傑然為諸曹望非此莫  
可與為郡者於是請于上而用之先是嘗擬君為按察  
副使屢不值允命至是乃拜擢人或謂今之在郎署者

不十年則擢擢則往往為藩憲而刑部尤捷今君舉進士二十有八年在刑部十有五年為之寮佐多其科目後進居數年輒被擢以去者若干人矣而君始得擢又不過為郡其將弗釋乎此矣是蓋非知君者郡守之職在古為諸侯國位尊而責重而開封又郡之大者其所統州若縣四十有一屬吏數百地方千餘里殆半河南諸郡天下之郡莫與為比此其職尤重也且官之在天

下惟其所用以為輕重今材行如君地望資格如君以

羣議膺簡擢如君者而使為郡是非特為郡重而君之重又可知也況人之於官也亦惟其才之小大以為舉墜而不繫乎崇卑蚤暮之間哉又況君子之所存者惟視吾所當為與其所得為者而已哉君之言曰開封重實地歲方歉民流徙且半校之他歲其難殆十倍吾懼官之不克任也若議畫方略若發公帑賑饑民省諸州縣遠運增芻戶價不足令民為鄉積以備凶歲者若干事而不及其私一言於是聞者皆曰金君其果不以秩位

為輕重也又曰君其果克勝茲大郡無負也又曰吏部  
其果能得人以重茲郡也于是皆喜君之去而所以望  
君之入者益深代君為郎中者屠君元勳暨其寮案諸  
君子相與餞君謂予亦知君者請述君志及士大夫之  
望于君者以為贈行序

送施彥章通判黃州序

成化丁酉春三月吏部以例試國子生之隸選籍者無  
錫施君彥章亦在選中既試名在優等而其器貌尤魁

碩出于羣輩大家宰實意屬之既又詢其鄉人考功郎  
中陳君朝用考功曰此賢貢士也遂擬授通判得湖廣  
之黃州府云吾聞善用人者必廣諏博采如呂文穆之  
容叢虞允文之材館錄惟恐其不多也善舉賢者惟其  
公而不他計如祁奚之舉親舅犯之舉讐惟恐其不盡  
也夫使人人得各舉其善故天下之善皆萃而為一其  
有遺焉者寡矣及其弊也或以為請託賄賂之私故在  
上者恒疑乎人而在下者亦自疑之不暇于是逆詐以

為明避嫌以為介詢察之道日廢薦舉之路日塞士之所為善者不過身言書判之間耳此其為用不已狹乎君子于是舉也見冢宰之信人考功之自信黃州之信于其友如此也夫以今郡縣之衆往往視貳佐為常職察之不能徧則不過以銓試之等而用之如黃州者乃以大郡居要地故處之加詳使職職而詢之人人而舉之而所謂詢與舉者皆不相負若是天下之善可不勞而萃也吾又聞薦人以為國者報之必以國事故張安

世以私謝為恨范文正以私報為辱今之所謂恨與辱者亦異矣通判之職所以佐貳郡守于郡無不可問之政況施君以美才理大郡其勢必不能汨汨與常職比使他日論功課績者得指而颺言曰此賢有司也以是論考功報且不為冢宰辱也不已多乎若夫執德不堅為政不力使議者得藉口以疑天下之舉則世之恒弊非所望于君者也

武昌徐公輓詩序

異財之俗半天下江南之人以田畝為業蓋有身在襁  
褁而籍於父兄者以為恒事若是者非惟教不行于世  
要其因襲承授勢亦有不得已焉于是欲起而變之者  
必有一人焉君乎其家而後子弟化必有一人焉望乎  
其鄉而後鄉黨革此其人必躬履實踐已睦矣而後可  
以責人之疏已讓矣而後可以責人之競漸摩薰染入  
乎人者深使人人利于義而恥于俗度乎其可又必有  
一人焉繼之而後可以長保而不變予嘗患斯人者之

難得也嗚呼吾鄉復有如徐公文德者乎予嘗聞徐氏  
武昌鉅族居府治者數百指居于別業者又數百指而  
公以族長往來居其間食飲衣服惟公是司租賈出入  
惟公是籍子弟婦女無忿言戾行及異議者焉則歎曰  
何為其能然也既又聞公事親色養喪居哀毀與昆弟  
處怡愉終日口不及財利苟事涉于利輒推而弗居少  
有違拂不以為意其弟敬夫婦皆蚤死遺女又為之撫鞠  
俾底于有家又歎曰天下之事以利則骨肉可以為讐

敵以義則道路可以為兄弟嗚呼利之為害亦久矣以予觀于吾鄉復有如吾徐公者乎予之聞公家範也實于其子監察御史鏞公來京師嘗一見遽去去數年始悉聞其行于中書舍人楊君應寧時公已卒數月矣予因歎斯人之難竊有望于吾鄉者而公亦已矣嗚呼悲哉鏞既告喪歸治葬事少詹事樸菴黎公先生為銘公墓載公善甚悉諸縉紳士賢鏞及哀公者又為輓詩若干篇予獨感乎同居之義尤切故序之加詳庶其宗之

人之有感焉以保公之業以及于吾鄉也則翁之卒亦  
可以無憾也夫

送張君汝弼知南安詩序

華亭張君汝弼博學工詩有文章尤雄于草書乞其門  
者踵接無虛日卷軸填委聲名遍天下凡論今郎署之  
有文章者必曰張君張君然君恒若弗自屑每論古今  
人政得失介然不容髮事涉忠義輒力為之扶植褒獎  
無所孫觀其意不欲與齷齪者齒慨然思有所施于世

故凡論文士之有風槩者亦必曰張君張君君得科第  
晚徊翔郎署間為貳佐歷武庫車駕政皆簡中間惟武  
選稍繁劇又不久處落落無大以自見然益負其有不  
能屈以干人循次待籍十餘年而有南安之命論者又  
謂如君者置之朝廷之上雖不日煩政務亦足隱然為  
諸曹之重而必使為郡郡所領皆吏事非其素習不能  
無惑乎今之為銓曹者噫斯言也可以觀俗矣夫惟世  
之有銜華藻而不達于政者有狂志高論揆之實用而

不足者而後有是言以此槩士其失之粗矣夫所謂政者必抵經據史飾之以材藝資之以議論而振之以氣節然後左宜右有旁行而不滯苟泥法守律剪剪焉寸紙隻字之間而曰我善為政今之所謂能官者吾惑矣慨自儒吏之迹判而士往往不得以盡其用用之不盡乃或從而短之豈所以待天下之士哉豈所以待天下之士哉予之懷此論久矣方喜君之得試其所未盡亦以窺銓曹者之得用人之道于此也而又奚惑哉與君

游者多時名大夫士皆為詩以相君之行予非工詩者  
又不可為君默則以太史喬君師召之意為序云

邵孝子詩序

戶部主事湘陰邵君汝學蚤喪父事母李氏甚勤苦居  
常愉色每出飲未嘗至醉值蔬果輒懷歸奉母母疾衣  
裳不解帶日親湯藥雖唾壺穢器必手自澣滌或激澆  
其面弗見于母母既安寢乃徐而拭之母喪哀毀累日  
而後食食必粥葬之日寢苦枕塊廬于鳳山之墓三年

孝行甚異門人龍來雲輩倡于鄉鄉之人陰陽訓術傅時省輩狀于縣縣大夫奏于朝事下禮部移御史及按察下郡守遞為覆報皆無異辭朝廷以例表其門為孝行時君已自鄉貢舉進士例得再建綽楔至于是凡三焉今之例有司以綽楔表于門者凡科目之事與孝順節義異行之家皆然表科目所以勸為仕表異行所以勸為善勸仕者固將以求其行也然仕者恒有而行之異者不恒有故苟有異行雖州里婦猶表而旌之其

禮加重人之得之者亦加榮焉況仕者之有是行哉今  
表仕者于鄉鄉之人起而慕之而凡天下之為仕者勸  
表異行于鄉鄉之人起而慕之而凡天下之為行者勸  
鼓舞欣動之機固各以其類應有不可過者而況乎兼  
之者哉天下之行不必皆勸而後成然亦有俟于勸者  
夫所謂州里婦其行不出乎畎畝閭閻之間及于人  
之耳目者近近則未易徧仕焉者名籍在朝廷勲業在  
臺省觀望在天下於此有異行焉為之上者又表章之

不暇其所感動宜何如盛也今聖天子孝理隆洽法制  
精密善必聞聞必勸而君方以異行登顯仕膺旌異之  
典是以其身繫天下之化者其責亦加重夫豈可例而  
觀之哉古者國有美政鄉有善俗必播諸詩歌以風勵  
天下薰陶誘掖蓋有深于教令者吾黨則有不得而辭  
焉與君偕舉進士者若干人為詩若干篇而東陽竊以  
鄉士為國史尤親且近因序其事以佐君勵天下庶幾  
自吾鄉始

賀陳先生誕孫詩序

成化丁酉三月十八日翰林諸同年會于師召陳先生  
第既有成約予與鳴治先入懽其有喜色問之曰適得  
莆報大兒舉得一男矣時同年皆未有孫孫實自師召  
始予二人喜甚亟呼酒飲師召師召曰請為我賦鳴治  
倡為句予繼之已而衆客以次至皆遞為句句八繼而  
成律明仲再倡律再成衆乃屬予大書于堂壁師召不  
欲以觀賀者掣予肘再四不能得拂衣入少頃忽笑而

出視予書且視且喜衆客競為助喜歡聲動堂陞回顧  
僮僕皆欣欣若有懌色師召獨據几諦誦曰固亦佳事  
也意始悔沮予書書成敷五後至不及與獨和二章明  
日衆客皆重和越數月汝賢還自莆又續和焉于是聯  
為巨軸盛供具以贈之而師召蓋大設席饗客以為例  
例亦自師召始云嗚呼師召為人純樸簡易藹然古君  
子風其考文析理極精盡密而名數世故之粗或遺略  
不屑計立心制行介介不可易而包垢含穢口不稱人

過日與之處而若不見其有異者人無問親疏遠邇皆樂且信師召召亦自信不復疑于人予嘗謂其氣象悠遠其為福澤宜深且厚徵諸子孫亦固然哉又聞諸師召言其先祖宋觀察使淬父子皆死國難旌為忠孝曾大父義軒下暨祖彌皆能以容忍惠讓為德數百指之後昆三百餘年之世業於是乎涵江之澤遠矣昔陳大邱氏祖子孫三世同德文人史氏尚侈言之是詩也雖出乎一時之談笑然于平生交際之情諸家世講之好

亦可以觀矣請為諸君序之以傳乎其家

送閩縣令周君序


縣之為政至劇也其隸于府者倍之隸于藩則又倍之予嘗遊東南諸大藩親見其所為令者朝夕奔走經畫之不暇問其賦稅刑獄校之旁縣若無大相遠也徒以呼召迎送之繁徭役供億之費用之無時取之無藝日益而月復增是固勞乎為民亦難乎其官矣夫人以身應衆事其勢不能盡有所詳必有所略詳于政務者無

上賞而略于承奉者有顯罰人之情孰不慕賞而畏罰  
于是擇上之所急者為之則民愈勞而官亦愈難矣于  
此蓋有說焉蔣沈之在高陵郭令公戒其麾下曰得蔬  
飯足矣毋撓其清何易于之在益昌身為民引舟刺史  
崔朴愧之與客亟去下上之相感固如此無何之誠心  
與蔣之素行而徒以此咎上之人亦何恠其為難也哉  
比者朝廷命簡太學生為州縣正定海周君志尹得福  
建之閩于時為銓曹者曰閩劇邑也非夫人莫可與茲

任者閩人之仕與游者亦曰吾閩之劇也而得夫吾侯之賢也翰林脩撰林君亨大以贈言屬予予惟為縣之政亦多矣民為重故就其所急者言之周君以太學生舉鄉貢習於民事所以舉其官者蓋必有道其毋專事乎呼召供役之務俾議者謂銓曹之所擇與士大夫之所望者徒以此也今閩藩稱賢方牧者固衆亦安知無郭令公崔刺史者以成君之美哉



懷麓堂集卷二十三



總校官庶吉士 臣張能照

校對官檢討 臣龔大萬

校對官庶吉士 臣翟槐

騰錄監生 臣左顯若

騰錄監生 臣丁芳葵

欽定四庫全書薈要

集部

懷麓堂集卷二十四  
五



詳校官候補通政司經歷臣郭祚熾

欽定四庫全書會要卷一萬六千六百五十三 集部

懷麓堂集卷二十四

明 李東陽 撰

稿四  
序

封吏部郎中倪公輓詩序

禮部郎中倪君良弼之喪其父介菴公也故吏部侍郎  
葉文莊公有表翰林侍講學士鏡川楊公有誌廣東叅

政劉君欽謨有傳諸大夫士皆有詩其為傳世計甚遠而良弼猶欲予序其事曰同年之誼十五年于茲矣嗚呼予何以加於諸公之言哉予觀介菴居鄉直氣正色喜分別白黑不為諛佞民有為豪右所奪而不能訟者為暴于官鄉人不相直輒詣門請質得其言輒俯服去故鄉之稱直諒者曰倪公其人良弼始為吏部改今官飭行持法遇有不合斥言高論雖權貴不少為孫借或鬱不得洩則耿耿不能寐故士之稱直諒者必曰倪君

其人嗚呼賢哉何其德之相似也昔陳咸言事譏切近  
臣而其父曲為戒諭孫盛作晉春秋直書時事而諸子  
號泣請改向使父子易地而仕則其所建立者異矣世  
說古今人不相及觀於君之父子之間豈其然耶夫人  
之才德同而其所立又有遇不遇異者故其成也可幸  
其不成也可惜若司馬氏之文章王氏之相業或倡乎  
其前或成乎其後君子蓋惜其父而亦未嘗不幸其子  
也介菴雖不仕而能使其子仕仕而有所立如此是可

徒為介菴惜而不為介菴幸邪良弼既不妄交凡為詩  
必相與遊處稱知己者人亦慎重不苟為應答故其詩  
皆可觀誦與其傳狀表誌蓋互相發也後之君子考介  
菴之為人惜其不得仕而幸其子之有成者必自是詩  
始作輓詩序

送太常鄭先生之南京詩序

太常之職官尊而貴重不與他監寺比故其為選必取  
之清密禁近之臣比者南寺闕當補方銓部未擬制命

未下議者求之翰署官僚之間則曰仁和鄭先生其人  
也已而果然初先生自禮部入對先帝試其策第一等  
得進士及第入翰林為編脩今皇帝卽昨同脩先朝實  
錄成進脩撰居數年又脩續資治通鑑綱目進司經洗  
馬凡四命而至是職於是辭編摩考校之務而司禮樂  
制作之柄輟經幄儲宮之直而奉宗廟陵寢百神之事  
官日尊而貴命重矣君子謂其初命也以文其再命三  
命也以勞其今命也則以材行地望是其官非苟得而

朝廷之擢之者非徒于資格而止也先生之歸省也念  
母夫人老不能遠就祿養而國事之重官不可久曠乃  
留其妻若子而獨處于官雖居京師察其志未嘗一日  
不在膝下今密邇南國得舟楫之利將先歸拜母而後  
迎養于官此又人之至願而不易得者也昔崔慶仁為  
太常親導母輿趙彥深為太常不脫朝服而見母史冊  
書之以為美事然則進不負國而退不遺親持不苟得  
之寵以成不易得之樂如今日者非先生之賢其孰能

致之我先生之行也公卿以下皆歎慕歌頌分曹而餞  
之其門人刑部主事陳洵員外郎沈銳尤親且厚既自  
為詩又以倡諸同曹及所與游者總若干篇為一卷謂  
予嘗以鈔槧從先生後屬為序先生在翰林不妄交生  
徒其所誨迪必先忠孝今日之行固臣子之義所繫若  
二君者亦豈但師弟子之私而止哉

送蒙菴林先生南歸詩序

聖人之道仕止久速惟其時而無所必蓋惟孔子能之

雖伯夷柳下惠之聖不過得其一節中庸之不可能也  
固如此然人之情恒易進而難退故賢人君子必謹於  
所易而勉于所難時有所不可則去不得其職與言則  
去居其位而力不足以勝之則去是其退也恒易而進  
也恒難蓋必知有所不可不退而後進則其進也非干  
祿知有所當去而後留則其留也非貪位君子之心豈  
惡進而樂於退哉然世亦有果於忘世而去者有因所  
激而去者有去於勢所不得已者有索隱行怪徼一去

以為名者於是利祿之士顧得以藉口於其間故論出處者必參其平生而考之自辭受取予之常驗之乎進退之大而後可知也蒙菴林先生始仕為行人即以母老謝病歸十有一年既終養乃出供職補遷為司正當道者欲薦為提學辭不赴九載循例進兵部車駕郎中未數月再上疏請老事下吏部以先生賢且年未六十則不得致仕格不為覆移兵部及遣官屬敦諭令勉供事而先生意已決乃乞以養疾歸疏又再上且致書冢

宰司馬諸公懃懃數百言竟得請去此其進不可謂不難而退亦不可謂易矣先生蚤有志於古聖賢之學動循規度與之處溫然可親其為司正誘掖勸戒一時寮屬皆翕然尊仰益振厲為名節是雖未及於大用知其非徒進者今日之去其所自處諒必有道焉而予也非所敢及也或者乃欲以微事窺之是惡足以知先生哉與先生游者洗馬羅先生明仲輩皆賦詩贈之用冠菜公詩二句為韻是詩先生嘗揭諸坐右蓋有合於易退

之義者故諸君取之而予獨推其意為序云先生名雍  
字萬容甲戌進士蒙菴其別號也

送武選汝君之南京序

吳江汝君行敏舉景泰癸酉鄉貢為國子生成化初會  
脩先朝實錄以能書入與史事予時濫在館局見其為  
書楷正有法表然出儕輩書成授中書舍人凡卿大夫  
士所得誥勅皆願得君手筆故君書傳于世日多九載  
秩滿有南京武選員外郎之命則戊戌十月也實錄之

典職書者例以恩得中書時臺閣執政者以為太廣獨  
嚴資格惟貢士及國子生乃得是者不過數人考績之  
典自中書滿者例得遷員外郎近歲吏部亦以為太汎  
乃因內閣議分為三等得是者亦惟科目之士為然于  
是知君所處地雖藉恩循例皆非輕授而幸得者也然  
其初命也有謂中書雖清近而不與政事以為君惜其  
再命也有謂兵部雖繁要而南署所掌不及北曹之半  
未足以大紓厥蘊蓋君之所得人不徒不以為幸且以

為未足者如此也夫行能辭藝皆所以為世用而進取之機官守之分則有不同君子之於官也必吾之所當得得之不為幸必吾之所能為為之不為彊寧用我者有所未盡而吾之處之者有餘使心有餘慮身有餘力歲有餘日而復以其所餘者自盡于其間於是乎曠官廢職之咎寡矣君在中書翰墨之外詞章議論溢人耳目故雖用者以為未盡而君之有餘者固存武選之職領武冑封拜傳襲之事今天下功籍日廣冒偽之弊興

考覈取舍以嚴今日之選者君之事也而又積學蓄德於其餘挾庖丁之力操郢人之斤以待天下之用吾知其有餘地也先君為員外郎者李君應禎李君與君同鄉同為中書聲價相甲乙又適有交承之誼聞斯言亦未必不為予首肯也

退菴陳公輓詩序

君子之於天下其視患難之加乎身者得之不為悔脫之不為幸惟義所在而已世之矯情以徇名者弗論若

感激奮迅發於一時決于一舉者亦或有之惟屢仆屢起至於死而不變則非誠有安乎是者莫之能也易曰君子以致命遂志孟子曰所欲有甚于生者故不為苟得也夫豈固為是之為快哉顧時與義有不得不然者此其志亦可哀矣退菴陳公之卒也鄉人哀之至為之歌詩愈久而愈不衰予得其詩於公之孫國子生悅乃取其傳狀表序而觀之則歎曰是誠可哀也公在水樂間為河南布政叅議坐事謫大和山佃戶宣德間為御

史出按江西以言事入繫詔獄正統初再起為御史論  
遼王事復坐死尋復為御史以福建按察僉事卒于家  
公平生屢涉奇禍皆人所不能堪者而江西之禍尤烈  
闔門十六口皆錮獄中父既疾死而羣從子姪幾就蠶  
室當是時陳氏之不絕者如綫其禍之烈至于如此况  
其始也出於編置流徙之餘而其繼也又執法抗論以  
蹈必死之轍於是知公之心誠安焉久矣及其尊官壽  
考令終牖下則固公之所不暇謀以其所不敢幾者而

得之矣以為公哀邪使公萬有一不幸於其時公之志固可以為遂而典法之得失士氣之興沮有不可言者於是又知公之生猶幸得其時而君子之不待死而後遂其志也而又奚哀邪然公之孝友足以厚倫理材識足以斷政事氣節足以勵風俗其存其亡關乎天下者甚重人之哀之不啻乎死生進退之間而已夫若是吾固將為天下哀之豈獨于其鄉于其子孫哉於是大夫士聞而為詩者又若干篇合為一帙而悅以請于予遂

書以為序公諱祚字永錫蘓州吳縣人也

送顧天錫序

予與顧君天錫交殆二十年合而離離而合閱歷既久所以相與者益深天錫知予予不敢負天錫也天錫居家孝友母喪歸吳廬于周山之墓足不至城府者三年事其兄光祿公甚謹弟祿早卒以次子後之卹其嫠婦俾不失節故人潘郎中廷用客死婚其子教且育之而歲賙給其家雖負券未釋日汲汲為之不厭也在刑部

奉命錄刑山西伸理寬抑雖罹怨坐累不少顧卹再勘  
所囚大獄守法遵制至不敢入其鄉邑此其志大抵重  
名義而輕私圖者也是予於天錫不可謂不知而天錫  
豈予負哉夫人之出處離合存乎命是非毀譽存乎人  
皆非君子所自盡者天錫蓋屢屢為予言之故詔獄之  
下工曹之贖永州之謫皆俯首與受退而默無一言然  
其曲與直固在也君子之處世汎安流馳坦途者不足  
以為難惟涉患歷難然後可見天錫勉乎哉今日之地

固天錫所以自玉於成者也若夫在命者委之於不可  
知在人者付之於不必校豈足為天錫道哉大夫士知  
天錫者多贈以詩詩皆感慨期勵無愁苦嗟歎之態者  
為天錫道也予于天錫深有感乎茲別獨所感有重於  
別者故舉其所重言之

送徐君再守荆門詩序

成化戊戌荆門州民若干詣闕言臣州守闕願得前守  
徐某為之事下吏部時徐君方以家艱起復上京師遂

復有今日之命蓋自君去其州三年又歷一守去矣而始再蒞其地於是朝士皆謂茲州之不可以無君而君之能感其人者如此也乃為歌詩餞之吾同官張君亨父屬予序天下之譽皆可以妄取惟於民不能偽蓋其勢重其地親其為情也平而無所執故或能使台省交薦不能孚於匹夫之心能使左右稱賢不能得於國人之口天下之所謂公論者至於此而後定然感之於旦夕非難懷之於久遠者難若有故而去去而久久而思

思而復欲得之者其亦鮮矣官之設以為民也而得乎民者其難如是故古之賢者在官則有久任之典既去則有復借之令凡以為民利也今以閭閻之賤而干殿陛之尊不可謂不誠以君相之命而下從匹夫之願不可謂不專且重矣而徐君當之其不謂之誠難乎哉古之君子名成而行益勤任重而心愈憂蓋人之責乎我者重則吾之所以副之者愈難責而莫為之副不若無其責之為愈也徐君勉乎哉夫使其民如饑者之必飽

渴者之必飲愈久而其心愈不忘者君今日事也然非  
力倍蓰不可得若謂事半乎人功必倍之如孟子所云  
者此則交承之論非所以論始終之際也徐君勉乎哉  
諸君之詩多寵君且期遠者予為是說以相君君誠賢  
者有志用世必不以予言為不佞也君名泰始字士亨  
改字大同世為江陰鉅族舉解元試御史事補知羅田  
縣以才能擢今官云

韓氏族譜序

韓氏舊無譜祖傳居平陽之洪洞者前後二百餘年此地多兵燹遷徙不常雖士大夫家既無譜如韓氏者而不獨韓也工科右給事中貫道始以其父徵仕公命作譜京師由徵仕公而上得八世有韓永者為始祖自始祖及給事君為十世世有昆弟累至數百人皆以法並紀曰我不敢遺也十世而上聞有顯宦者而名系不究則闕而弗書曰我不敢誣也君子謂其善為譜是可為其鄉作譜者式而不獨譜也譜之道所以尊祖考合宗

族興孝弟之義以成敦厚之教甚重也人之親有可窮者有不可窮者夫親始於高祖窮於玄孫而服窮於總此可窮者也由天下之異姓以求吾之同姓由吾族千百人之身而溯乎一人之身愈遠而愈不忘此不可得而窮者也故禮不可過而名義不可隳譜者所以存名與義者也因其不可窮者而求之則所以尊祖敬宗者蓋不容於不厚矣然孝弟根乎心而教本乎身故必孝而後可以教吾之子弟而後可以教吾之弟能尊吾之

所自出而後可以引之於無窮若徒存其名而不自盡  
其實則彼所謂父子昆弟者且不知厚焉况數世之遠  
千百人之多措而語之曰某而祖也某而祖之所出者  
也孰從而信之孰驅而厚之也哉故譜者君子重之而  
所以為重者不在此也韓氏用醫起家仕有恒業徵仕  
公以隱德承家學為醫學訓科給事君既貴乃棄官就  
封拜徵仕郎工科給事中之命而韓氏始顯公有從祖  
兄弟數人皆居同業食同爨予聞之給事君而君清謹

醇厚有志乎名教之大者其家教可知也豈獨是譜然哉然後之孫子推其所自出幸茲譜之有存而思所以不忘者必自給事君始作韓氏族譜序

怡菴楊先生輓詩序

國家之制凡爵賞外有所謂封贈旌表者旌表之命必篤行高節始得之封贈之命非其賢子孫能稱位舉職者莫能與皆天下之盛典也夫旌一人蓋曰使天下之為善者勸封一人蓋曰使天下之為教者勸然必其人

之不愧乎其身而後可以勸乎人於是有以一人兼二命而又不愧為者則其為勸也倍矣山陽怡菴楊先生克彰甫居家至孝母喪居廬致有異瑞被旌為孝子中歲失儷不復再娶以成其子之業獲封為刑科給事中君子謂其旌也不愧乎為人子其封也不愧乎為人父使凡旌與封者皆先生其人其為天下勸豈不厚哉夫苟其身足以勸天下則凡人之有身者皆得法乎其為善有子孫者皆將慕乎其為教其存其亡足以為重輕

忻戚者亦豈不既多矣哉先生年七十時其子貫之為  
給事中大夫而下皆作歌獻詩予得而序之其卒也給  
事已遷大理丞秩加顯公卿而下皆弔哭哀挽其為詩  
加多焉大理復以屬予予方願壽先生之年而遽傷先  
生之沒始終之義固不可得而辭也獨念先生之重于  
世以賢而賢之著以有旌封之命故獨敷揚其義為天  
下道之以重諸公之哀云

遊朝天宮慈恩寺詩序

成化己亥重九前二日翰林脩撰謝君于喬以詩約遊  
朝天宮是夜雨翌日天霽于喬喜復以詩速客於是編  
脩曾君文甫王君世賞刑部郎中馮君佩之皆赴至崔  
郭二道士宅和于喬韻各二首于喬倡為詩諸君輒和  
繼各倡各一道又輒和和且半予始至自內直詩皆如  
諸君之數已乃為聯句文甫以事先歸遽口占二句而  
去又得三首獨編脩楊君惟立以詩報不至翌日始并  
和焉先是佩之遊慈恩寺與僧瑢訂九日之約預約者

郎中李君若虛屠君元勳及予予方有侍講陳君師召  
之會以舊約不可負預以詩謝之至日與諸君次第俱  
往沿楊柳灣歷萊園觀稻田臨海子望鐘鼓樓訪桔槔  
亭故必留連竟日復倡且和如朝天之作共得三十六  
首已復為聯句世賞先歸亦口占一句而去四君暮枉  
予家呼燭續錄得十首於是合而書之為一卷都城之  
可遊者道院惟朝天僧寺惟慈恩為勝慈恩即舊所謂  
海印寺者在予所居故里有林木水石視朝天為尤勝

獨朝天以于君主居雖不必景勝殆以人勝也是遊也  
皆以菊節起興而今歲候差晚所至菊未花諸君之詩  
若有不能忘情於此者夫歐陽子意不在酒而在山水  
之間以予觀之則所謂山與水者亦寓焉而已若是則  
今日之景且不必恃地以為勝而况物乎噫諸君非好  
遊者也出處聚散之情張弛之義蓋於是存焉則是詩  
也不可以不書也是為序

賀楊母太安人受封詩序

巴陵楊君應寧既以中書舍人滿三載書最于吏部當  
貶贈其考化州公而州佐秩從六品稍尊中書雖屬禁  
近品顧居七乃以例給化州同知勅而進公階儒林郎  
其母張氏從夫階當封安人而例以獨存故得稱太蓋  
其號加尊焉封贈之制凡父官尊于子則從父官卑于  
子則從子惟貴之從而不為殺此國家待士之至于是  
應寧之所得被者亦厚矣且凡所謂誥勅必京官之能  
舉職及郡縣官之有美政被旌異者乃得之化州公廉

潔有異績而當時藩司部使無能旌之者則太安人之  
命與應寧之貴且才也殆公所質于天以遺其家者乎  
予始見公敝冠束帶又或時被褐布衣居京師一第不  
能旋馬若未嘗擁車騎出佐一郡者太安人之封也予  
往賀而見之時雖貴有祿養命服之外無所增飾固其  
儉朴天性而化州之素風遺教蓋未改也昔范氏歐陽  
氏之母皆舉父事以教其子成其賢名而其身固在食  
其祿人謂為范氏之母易為歐陽氏之母難有子如應

寧者親及其父之教而又有太安人以終之何恠其成  
之易如此也又况應寧年甚少志業甚銳而太安人方  
康彊優裕猶有所待而益成耶然則太安人之命不獨  
為今日賀且自今日始殆其兆也應寧上世滇南人今  
定居京口而巴陵實故郡且其所受薦地有名薦故于  
湖南之士尤親湖之仕者皆往賀太安人賦詩為壽而  
予與應寧尤厚故為詩而又為諸君序之

赤城詩集序

詩之為物也大則關氣運小則因土俗而實本乎人之  
心者道同化洽天下之為詩者皆無所與議既其變也  
世殊地異而人不同故曹幽鄭衛各自為風漢唐與宋  
之律代不相若而亦自為盛衰逮至于元其變也愈極  
而其間賢人義士往往奮發振迅為感物言志之音者  
蓋隨所得而成焉然亦鮮矣夫自樂官不以其詩為教  
使者不以採詩為職是物也若未始為天下之重輕而  
所關者固在也然則不得與于天下者因其所得為而

求之亦固非君子之心哉浙之東有州曰台古赤城郡地也其人固多能詩吏部郎中黃君世顯翰林侍講謝君鳴治誦其遺篇而胥嘆曰此吾鄉文獻之懿其不可以廢乃輯宋宣和至我朝洪武永樂間得數十人若干篇為六卷名之曰赤城詩集初宋理宗時有林詠道者嘗輯為天台集今刻本不傳天順初國子學錄張存粹輯黃岩英氣集而不及旁縣至是始粹然成編予得而觀之其音多慷慨激烈而不失乎正蓋宋元季世甲兵

饑饉迄無寧居國初一統甫定而其君子猶有感時悼  
昔之意風標義槩或出乎憂患疾疾之餘者皆可得而  
見也若唐項斯宋楊蟠之徒皆以詩名而世遠不可究  
故存者左經臣而下不過數十人使數百年之間有如  
二君者時輯而代錄焉當不止是以其止于數十人也  
則及時而為之其容以後乎哉二君將以是詩屬其鄉  
按察副使應公志欽鉉梓廣東復懼其未備將益蒐輯  
以為續集今文教日隆作者彙出方大鳴太平之盛其

或有繼二君之志者雖百世可也

懷麓堂集卷二十四